

The following text is written by Laura Green, a teacher based in West Lothian, and was originally written for The Chinese University of Hong Kong as part of a project on linguistic diversity.

Hogmanay

Hogmanay is the Scots term fir New Year's Eve. This is celebratit across Scotland, an o coorse the rest o the warld, oan the 31st o December ilka year.

Fir a lot o folk, some o the traditions hae meltit awa, but when I was a wee lassie they were still gaun strang.

Yin o the traditions I ken o, an experienced a lot when I was a wean, is first-footin. First-footin refers tae the practice o welcomin a visitor intae yer hoose efter midnight. Sae, traditionally, the first-footer is literally the first body tae set foot in yer hoose oan New Year's Day. Some folk say, that traditionally, yer first-footer maun be a tall man wi daurk hair. Sae, when I was wee, we wid bide in the hoose tae efter 'the bells' - which is whit we cried the ringin of the bells o Big Ben in London, which we watched oan the telly - an then we wid head oot tae visit freens an neebors. In ither wirds, we widnae wait fir a body tae first-foot us, we wid gang oot first-footin oorsels. Ma faither, bein the ainly man o ma hoosehold, wid be the first body tae chap oan the door o oor neebor an he wid also be the first body tae step ower the threshold intae their hoose.

Anither hing aboot first-footin is that the body wha goes intae yer hoose first wid usually bring ye a wee present. Some folk wid bring a lump o coal, said tae mean that yer hoose wis tae be kept warm the full year roon. Bit, when I was growin up in the 1980s, maist folk had awready done awa wi their coal fires, an had gas yins ir electric yins. Sae we wid tak food ir drink tae help folk welcome in the New Year. If ye were really traditional ye would tak some black bun, ir some clootie dumplin, but we wid normally tak somethin gey easier tae get a haud o, like shortbreid. Ma mither wisnae yin fir spendin a lot o time in the scullery, ye see, sae she widnae hae hud the time nor the inclination tae make somethin like clootie dumplin.

An it has tae be said that ma faither widnae hae dreamt o gaun first-footin athoot a drink fir folk. Sae - he wid tak his ain boattil - at least yin boattil - o whitever he was drinkin, like whisky ir rum, an he wid make sure that his freen ir neebor had at least yin guid measure oot his boattil afore he wid tak yin.

An finally - yin hing tae be aware o is the tradition o singin 'Auld Lang Syne'. While we wid aye watch folk singin this oan the telly, an we were aw familiar wi the sang - at least the first verse, onywey - we widnae link airms an sing it oorsels. I've never been at onybody's hoose that *does* dae that at the bells, ir jist efter thaim. The ainly time I've ever done that tae merk the beginnin o New Year is when I've been oot at a bar ir restaurant.

Sae - thon was ma Hogmanay.

